

- मुख्यमंत्री भजनलाल शर्मा कयो- हरियाळो राजस्थान अभियान रे तैत ई साल दस करोड़ पौधा लगावण रो लगस-अजे ताई साढे सात करोड़ ऊं बत्ती पौधा लगायी ज्यां
- चुनाव आयोग मतदाता-सूची तियार करण मांय खास भूमिका निभावण वाळा बीएलओ रो मानदेय दुगणो कर्यो
- उपमुख्यमंत्री दिया कुमारी कयो -प्रदेश रा धार्मिक थळा ने पर्यटन सर्किट बणार विकास करयो जाएलां
- राज्य मांय भारी बिरखा रा दौर मांय कमी रे बीचे जयपुर अर भरतपुर संभाग मांय कुछ ठोडां आवता दो-तीन दिन मांय भारी बिरखा री आसं

000

मुख्यमंत्री भजनलाल शर्मा आज दिल्ली प्रवास रे दौरान जोधपुर हाऊस मांय 'एक पेड़ मां के नाम' अभियान रे तैत बील रो पौधो लगायो ई मौके वणा कह्यो के बील जस्या पौधा धार्मिक अर औषधीय दीठ ऊं महताऊ हैं जैव विविधता ने ध्यान मांय राखता न्यारा-न्यारा प्रजातियां रा पौधा लगावणा चाहिजें मुख्यमंत्री कह्यो के राजस्थान मांय 'एक पेड़ मां के नाम' अर 'हरियाळो राजस्थान' अभियान रे तैत ई साल दस करोड़ पौधा लगावण रो लगस राखी ज्यो हैं इण रे तैत अजे ताई साढे सात करोड़ ऊं बत्ती पौधा लगाया जा चुक्या हैं वणा कह्यो के राज्य मांय हरियाळी तीज रे दिन अढाई करोड़ पौधा एक रिकॉर्ड बणायी ज्यो है, जो प्रदेशवासियां री पर्यावरण रे प्रति जाग अर प्रतिबद्धता ने दरसावे हैं मुख्यमंत्री आज नुवी दिल्ली मांय भाजपा रा राष्ट्रीय संगठन महामंत्री बी.एल. संतोष ऊं मिल्यां इण ऊं पैला, श्री शर्मा काले केन्द्रीय मंत्री अमित शाह अर हरदीप सिंह पूरी ऊं ई मिल्यां श्री शर्मा प्रदेश मांय कर्या जा रिया नवाचारां, विकास कामां अर जनहित योजनावं री जाणकारी दीं हरियाळो राजस्थान अभियान रे तैत राज्य री न्यारी-न्यारी ठोडां पौध रोपण कार्यक्रम व्ह्यां ई कड़ी मांय कोटपूतली-बहरोड़ रा पावटा मांय पीएमश्री जवाहर नवोदय विद्यालय मांय एक पेड़ मां के नाम पौध रोपण कार्यक्रम व्ह्यो ई मौके जननुमाईदा, शिक्षक अर पढेसर घणी तादाद मांय पौधा लगायां जोधपुर मांय रक्षा प्रयोगशाला मांय आज मेगा वृक्षारोपण अभियान रा दूजा चरण री सुरुआत व्हिं अभियान मांय कार्मिकां अर वां रा पिरवार रा सदस्यां बढ-चढने हिस्सो लियों साथे ई लगायी ज्या पौधां री हिफाजत रो ई संकल्प लियों

.....
केंद्रीय कृषि अर किसान कल्याण मंत्री शिवराज सिंह चौहान आज एकर फेरु प्रधानमंत्री री अरज ने दोहरावतां देशवासियां ऊं देश मांय ई बण्या उत्पादां री खरीद करण री अरज करी हैं
.....

चुनाव आयोग मतदाता-सूची तियार करण मांय खास भूमिका निभावण वाळा बीएलओ रो मानदेय दुगणो कर दियो हैं इण रे साथे ही आयोग बीएलओ पर्यवेक्षकां रा मानदेय मांय ई बधवार करी हैं बीएलओ ने सालाना मानदेय छह हजार रिप्या ऊं बधार बारह हजार रिप्या कर दीरी ज्या हैं वटे ई प्रोत्साहन राशि ई एक हजार ऊं बधार दो हजार कर दीरीजी हैं बीएलओ पर्यवेक्षकां ने अबे सालाना बारह हजार रिप्या री ठोड अठारह हजार रिप्या मिलेलां अबे पहली बार निर्वाचक पंजीकरण अहलकारां अर सहायक निर्वाचक पंजीकरण अहलकारां ने ई मानदेय मिलेलां निर्वाचक पंजीकरण अहलकारां ने तीस हजार अर सहायक निर्वाचक पंजीकरण अहलकारां ने पच्चीस हजार रिप्या दिया जाएलां

000

भारतीय जनता पार्टी 10 अगस्त ऊं "तिरंगा यात्रा" निकाळेलां पार्टी रा प्रदेश अध्यक्ष मदन राठौड़ बतायो के 14 अगस्त ताई चालण वाळी आ यात्रा राज्यभर मांय मंडल अर जिला थर माथे निकाळी जायेलां वणा कह्यो के जात्रा रो मकसद देशभक्ति री भावना ने मजबूत करणो अर स्वतंत्रता संग्राम सेनानियां रा बलिदान ने याद करणो हैं श्री राठौड़ बतायो के ई आयोजन रा कामयाब संचालन सारू प्रदेश भर री टोळी बणायी ज्यी हैं

000

नागौर जिला मांय भक्त शिरोमणि मीरा बाई री कर्मभौम मेड़ता ने सैलाणीं ठौड़ रा मकसद ऊं विकसित कर्या जायेलां उपमुख्यमंत्री दिया कुमारी आज मेड़ता मांय मीरा बाई री जयंती रे मौके व्ह्या जळसा मांय बोलता कह्यो के मीरा भाई री आध्यात्मिक विरासत ने सहेजण सारू पैनोरमा परियोजना ने और शानदार रूप दियो जायेलां इण लाइट एण्ड साउंड शो ने ऊचां तकनीकी थर माथे अपग्रेड कर्या जायेला, जिण ऊं देश-विदेश ऊं आवण वाळी सैलाणियां ने मीरा बाई रा जीवन दर्शन अर भक्तिगाथा रो अनुभव कर्यो जा सकें उपमुख्यमंत्री बतायो के मीरा बाई मिन्दर परिसर मांय भक्ति आन्दोलन माथे आधारित संग्रहालय अर संगीत सभागार री डीपीआर तैयार व्हे चुकी हैं वणा कह्यो के ई हलका मांय कोई एक हजार करोड़ रिप्यां री लागत ऊं न्यारी-न्यारी विकास परियोजनावां चलायी जावें दिया कुमारी कह्यो के मेड़ता समेत प्रदेश री धार्मिक ठोड़ां ने पर्यटन सर्किट बणा र विकास रा काम कराया जायेलां

000

भारतीय खाद्य सुरक्षा अर मानक प्राधिकरण आयुष मंत्रालय री सलाह रे पछे आयुर्वेदिक आहार री एक सूची काढी हैं इण मांय खान-पान ने लेर भारत रा सदियां पुराना ज्ञान ने मुख्यधारा मांय लावण मांय मदद मिलेलां इण रे साथे ही उपभोक्तावां अर कारोबारियां दोन्यू मांय भरोसो बधेलां इण रे अलावा, आयुर्वेदिक आहार उत्पाद तियार करण सारू कारोबारियां ने भरोसेमंद सामग्री ई मिल सकेलां आयुष राज्यमंत्री प्रताप राव जाधव लोगां ऊं स्वास्थ्य लाभ सारू आपरा नित रा जीवन मांय आयुर्वेद आहार ने भेळा करण री अरज करी हैं वणा कयो के आयुर्वेद आहार शरीर ने पोषण देवण रे साथे रोग प्रतिरोधक बूता ने ई बधावे हैं

000

प्रदेश मांय व्हे री भारी बिरखा रो दौर थोडो धीमो पड़्यो हैं आज ई राज्य री न्यारी न्यारी ठोड़ां हळकी ऊं मझला दर्जा री बिरखा दर्ज करीजीं बारां, सवाईमाधोपुर, डीग, बांसवाडा अर सिरोही मांय बरसात व्हीं भरतपुर मांय संवारा ऊं रुक-रुकने बिरखा रो दौर चालें म्हारा खबरनवीस बतायो के लारला दिनां ऊं व्हे री बिरखा ऊं जिन्दगी माथे असर पड़्यो हैं

मौसम केन्द्र जयपुर रा निदेशक राधेश्याम शर्मा बतायो के आवता दिनां बिरखा री गतिविधियां मांय थोडी कमी आवण री आस हैं

महकमा मुजब आवता 5-6 दिन आथूणी राजस्थान मांय फगत कुछ ठोड़ां हळकी बिरखा होवण अर घणकरी ठोड़ां मौसम सूखो रेहवण री आस हैं वटे ई आज नौ जिला मांय बिरखा रो येलो अलर्ट काढी ज्यो हैं आं मांय सीकर, झुंझुनूं, जयपुर, अलवर, भरतपुर, करौली, धौलपुर, दौसा अर सवाई माधोपुर जिला भेळा हैं

000

पाली जिला री रानी पंचायत समिति परिसर मांय सात दिन रो आकांक्षा हाट बजार लगायो जावें इण रो मकसद स्थानीय उत्पादां ने बजार मुहैया करावणो अर महिला समूहां ने आर्थिक तौर ऊं मजबूत बणावणो हैं इण मांय राजीविका महिला स्वयं सहायता समूहां कानी ऊं तियार करीजी राखियां, सोजत री मेहंदी, शहद, मसाला अर घरू चीजां भेळी हैं

000

प्रदेश मांय आज न्यारा-न्यारा हादसां मांय मां बेटा समेत तीन लोगां री मौत व्हे गयीं श्रीगंगानगर जिला रा श्रीकरणपुर हलका मांय डिग्गी मांय डूब जावण ऊं मां बेटा री मौत व्हे गयीं पुलिस मुजब बेटा ने डूबण ऊं बचावण री कोशिश मांय उण री मां ई पाणी मांय डूब गयीं उठी ने पाली मांय दशा

माता री मूरत विसर्जन कार्यक्रम रे दौरान पग फिसळ जावण ऊं नाडी मांय डूबण ऊं एक मिनख री मौत व्हे गयीं

000

जयपुर रा जवाहर कला केन्द्र मांय चाल रह्या मेघ उत्सव रे दूजे दिन आज नामी लोक गायक मूरलाला मारवाड़ा री कबीर अर सूफी गायन री प्रस्तुति व्हेलां इण ऊं पैला काले उत्सव री सरुआत रे मौके अदनान खान अर वां रा साथी कलाकारां राग मेघ अर राग मल्हार जैस्सी मानसूनी रागां ने फ्यूजन शैली मांय प्रस्तुत कर्यां इण रे पछे नामी भरतनाट्यम नृत्यांगना कनक सुधाकर अर वां री टीम “त्रिदेवी” प्रस्तुति री मार्फत नारी रा मजबूत स्वरुप माथे आधारित नृत्य नाटिका प्रस्तुत करीं

000

अलवर मांय पांच अगस्त ऊं सेना भर्ती रैली व्हेलां 20 अगस्त तांई चालण वाळी ई रैली मांय अलवर, खैरथल—तिजारा, भरतपुर, डीग, धौलपुर अर कोटपूतली—बहरोड़ जिलां रा नौजवान हिस्सो ले सकेलां पीआरओ लेफ्टिनेंट कर्नल निखिल धवन बतायो के रैली मांय हिस्सो लेवण वाळा अभ्यर्थियां रो चयन अग्निवीर री न्यारी—न्यारी श्रेणियां सारु कर्यो जाएलां

000

भारतीय अंगदान दिवस रे मौके प्रदेश मांय न्यारी—न्यारी जनजागरूकता री गतिविधियां रो आयोजन करी ज्यों अंगदान जीवन संजीवनी अभियान रे तैत लोगां संकल्प पाना भर्यां देशभर मांय 1 ऊं 31 जुलाई तांई अंगदान माह मनायी ज्यों ई दौरान वेबिनार सूचना कियोस्क अर प्रतिज्ञा समेत केई कार्यक्रमां री मार्फत लोगां ने अंगदान सारु बधावो दीरी ज्यों

000